



ISTORIA de EUROPA

compilada par Vicente Costalago
linguaxe coretida par Simon Davies

Contenidas

Preistoria	4
Eda neolitica (7000 AEC a 3000 AEC)	4
La eda de bronze (3000 AEC a 700 AEC)	6
Anticia	8
La periodo clasica (700 AEC a 500 EC)	8
Jeografia	11
Cade de la Impero Roman	12
Eda medieval	16
Introdui	16
La barbares uni	19
Arte romanica e gotica	24
Potia papal en la eda medieval	26
Sosia en la eda medieval	28
Formas nova de arte	29
La Gera de Sento Anios (1337–1453)	31
La asende de la sites e la comersia	32
Crese de monarcias nasional	33
La pesta negra	34
Defias a la autoria spirital a la fini de la eda medieval	37
Eda moderna	40
Cambias economical e sosial	40
Renase	42
Umanisme	43
Mutas political	44

Religio	45
Asolutisme en Europa	51
La Lumina	53
Geras e revoluis	53
Eda contemporanea	62

Imajes veni de Wikimedia Commons.

Preistoria

Eda neolitica (7000 AEC a 3000 AEC)



Depinta en la Cava de Altamira, Espania.

La periodo neolitica es marcada par la estende de cultiva e seramica. Utiles como la axa de petra es comun tra esta periodo, ma sua orijina presede la neolitica. La axa de petra, an si simple en sua desinia, es perfeta capas de desforesti. On suposa natural ce utiles fada de lenio ia es ance disponible a la om neolitica. Iugos e arados de lenio ia es ance nesesada con la aumenta de cultiva. Par contrasta, lenio no es un material durante, e donce la trovas arceolojial es rara.

Atestas de sosias cultural ave la data de 9000 AEC en Asia e on crede ce la praticas cultural ia estende a Europa tra du milenios. On ave un discute sur la developa nondependente de tecnolojias no influeda par otra fonte ca la injenia interna de la comunia mesma, an si plu investiga va es nesesada per proba esta idea. Per nosa intendes, nos va vide la estende de la tecnolojia neolitica como dependente de sosias en contata con lunlotra, e nos va adere a la teorias de progreso de este a ueste.

La mar Ejeo e Europa sude

La atesta prima de un cultiva european es situada en Cnossos, Criti, e veni de la milenio 6 AEC. La Mar Ejeo, con sua isolas diversa con distantia corta entre lunlotra, e con bon clima, furni un loca ideal per coloni. Ondas serial de migra par poplas tribal diferente de la este ia gida a la institui de comunias tra la Mar Ejeo e ance longo la areas costal de Turcia e Elas moderna. Lo no es un coaveni ce la romanes ia crede ce los mesma es desendentes de Enea, la eroe lejendal de Troia, car la panteon de dios e eroes es locada en la leyendas e mitos de Europa clasica.

Criti como un de la isolas la plu grande en la Mar Ejeo es locada entre la costa de Africa norde, la sude de la penisola european e la costa de Anatolia, con recursos natural plu abundante ca otra isolas ejean plu peti, e un tereno sufisinte per suporta un cuantia de abitores grande ia es ideal per coloni. La colonistes de Criti ci ia ariva en 6500 AEC ia trae con se la praticas cultural de la este e la capasias de viajores de mar – du fatores ci ia fa un rol xef en sua asende futur como un forsa major en la Mar Ejeo.

En Elas continental, en la rejion de Tesalia, sentos de abitas neolitica ia es descovreda par arceolojia de campo, mapa airal e analise spetral par satelite. La planos aluvial de la rejion ia es atraente per comunias fundida e en cultiva e en eleva de animales. La analise de fratos e abitas mostra un cultur comun entre esta sites, e la seramica mostra un stilo distinguida e un tecnica arcitetel nomida “grilia fangida”.

Europa norde

La casas preistorial de gamon en Vingelz en Suiz (3000 AEC), con sua “fabriceria” de axas de petra e abiterias sirca un fonte de acua, es tipal de otra sites cultural trovada en Frans, Deutxland, Osteraic e otra locas de Europa. Esta “viletas” neolitica, construida sirca costas de lagos e pantanes de la Alpes, mostra un colonia continuante de 4500 anios. La Alpes no ia es un impedi per intercambia, car trovas arceolojial de

fratos de seramica, utiles de petra e abiterias mostra similia cual on pote esplica sola par contata e intercambia mutua. Probable esta “viletas” neolitica ia intercambia e intersposi tra la Alpes, an si esta ia es limitada en alga aspetas par la cuantia peti de abitores e ia es struturida par identifia familial e tribal en loca de nasionalia.

La lejor debe considera ce la rejiones de Europa ia developa a tempos diferente, an si redes de intercambia estendosa ia esiste traversante Europa en esta tempo. Esta ia permite alga grado de uniformia entre la periodos, e tal on pote grupi la periodos european temprana longo la trovas arceolojial, normal relatada con utiles e armas.

La eda de bronze (3000 AEC a 700 AEC)

La asende de la sivilia minoan (3000 AEC a 1100 AEC) e misenean, e sua influe en la isolas ejean e Elas continental, formi la istoria temprana de Europa sude. La descovre de esta sivilia temprana ia es la resulta de investigas par arceolojistes de la sentenio 1800 ci ia studia la leteratur clasica de la mundo antica per sua valua istorial, en loca de sua contenida mitolojial. La describes de res e sites a cual la *Iliada* refere ia es investigada per trova trasas etnografial e jeografial e sua locas.

Heinrich Schliemann e Arthur Evans ia es du abrivias en esta tipo de investiga. Schliemann ia xerca la site de Troia a la costa de Turcia moderna, e Arthur Evans ia xerca sites perdeda en la isolas ejean.

Schliemann, ci ia deveni rica como un contrator en la Gera de Crim, ia vade a un loca en Turcia oji nomida Hisarlik. Investigas prima de la loca de Hisarlik ia gida algun a proposa ce esta ia es Troia, la site perdeda a cual la *Iliada* refere, e cual pos miles de anios ia es conoseda par la regardores moderna per la cavalo de lenio. Schliemann ia es la escavor prima de esta loca, e sua descovre de Troia es considerada como la investiga prima moderna de istoria clasica en relata con sua mitos e leteratur. Corta pos la descovre de Schliemann, Arthur Evans ia descovre la sivilia minoan en Criti.

Schliemann ia fa un otra descovre grande: la sivilia misenean cual ia domina la isolas ejean. De importa spesial per la european es la tabletas de Linial B en Cnossos (Creti) descovreda par Arthur Evans. Esta tabletas de arjila conteni un forma de elinica anticin de la milenio 2 AEC. Esta es la forma scriveda de la lingua elinica (european) la plu antica cual nos conose, e donc sua importa en relata con la *Iliada* de Homero es fundal per nosa comprende e investiga de la mundo ejean en la eda de bronze.

Anticia

La periodo clasica (700 AEC a 500 EC)

La asende de la site-stato elinica de 1000 AEC es partial un continua de la ejemonia cual la sivilia minoan e misenean ia suprapone sur la rejion. An si la elinicas ia ave un punto de vista diferente de la site-stato, los ia developa formas de governa cual ia depende de la partisipa de sitadanes, de cual Atina en la sentenio 5 AEC es considerada como la apico.

Un de la aspetas noncomun de la sosia elinica ia es la esiste de la site-stato de Sparta, situada en la sude de la Peloponeso. Sparta ia es un potia militar rejional forte e un competor de Atina tra la periodo clasica. Lo ia es de interesa a alga atinanes como la filosofiste Platon, ci examina formas variosa de governa en sua libro *La Republica*, incluinte la sistem de caste de geror de Sparta. La ata de 300 spartanes ci ia defende la pasaje de Termopila contra la armada invadente persian es ancora considerada como capsulinte la esense de la site-stato spartan.

En la otra sites-stato de Elas, la forma de un stato militar gidada par un elite de oligarcas ia es temeda e amirada. La istoria de la continente elinica es liada a la disputa entre Atina e Sparta; ambos ia formi alias con otra sites-stato elinica. La Alia Delian ia representa la interesas de Atina e sua aliadas, e la Alia Peloponesian los de Sparta. La idea de la site-stato como un potia nondependente ia es tan forte ce la sites-stato elinica ia vinse sua enemia sola cuando los ia debe luta contra la invade stranjer cual ia menasa tota de los. Cuando la menasa stranjer ia es eliminada, la sites-stato ia reveni a sua enemia. A fini, esta luta interna entre la sites-stato elinica ia permite ce la macedonsces gania controla de tota Elas. La romanes ia vide esta estende macedonsce como un menasa, e la disputa cual ia apare a pos ia gida a la domina roman de tota Elas.

La apico de Atina en la sentenio 5 AEC es ance la comensa de la estende de Roma, cual ia es un site ensircada par otra tribus e sites-stato. La estende de Roma ia comensa como alias o atacas contra otras renas de Latio con intende de securi sua rol sentral en la rejion. A fini, cuando la fortia de Roma ia crese, ance sua estende ia fa simil, e pronto la sites-stato elinicas de la sude de Italia ia debe alia con Roma.

La divides tribal interna en Italia ia gida a la gera contra la samnitas (un tribu de la sentro de Italia) ci ia menasa la sites-stato elinica de Italia. La geras de Roma contra Cartago ia boni plu la loca de Roma en la rejion. Roma ia vinse la etruscas a la norde de sua site e la tribus ensircante. Lo ia luta contra la tribus de la rejion sentral e ia vinse los.

Aora la sude de Italia ia veni su la ejemonia de Roma como un garda contra la estende de Cartago par sua alias con la renas ejean oposante la potia roman. Roma ia deveni la governor de tota Italia en 272 AEC. Esta domina de Italia ia gida Roma a senti sufisinte forte per lansa operas militar contra Cartago. Italia, cual en multe tempo ia defende se contra la armada de Cartago, aora ia es atacante.

A fini, Roma ia ataca Cartago mesma en 148 AEC e ia priva lo de sua interesas en la Mar Ejeo e en Espania pos cuando los ia suplica per pas. Roma aora ia estende sua controla a tota la Ejeo e a la areas costal de Espania. Cartago ia es destruida e la romanes no ia permite abita la site denova.

La Impero Roman ia ateni sua apico en la periodo augustan (50 AEC a 20 EC). An si Roma como un republica ia ave concistas teritorial estendosa, la rena de Augusto es cuando la impero ia ateni sua estende teritorial la plu grande.

La rena de Augusto ia vide la fini de la Republica e la comensa de la Imperio. An si la bandera “SPQR” (*Senatus Populusque Romanus* – La Senado e la Popla Roman) ia ondeta, sua valuas republiciste ia inclina aora a la voles de la imperor. La periodo augustan es videda como un eda orosa per Roma – la pas relativa e la stablia en la rena de Augusto ia permite la flori de scivores e arte roman. Per la 40 anios seguente, Roma ia es la potia la plu grande en la mundo, an si a fini, en la sentenio 3 e 4, la presas ia gida Roma a abandona sua suporta per sua provinses.

La colasa de la Impero Roman, comensante en la sentenio 4 EC, ia causa un contrae de la relatas cual ia uni la sentros urban de Europa, ma lo ia crea ance la funda per la reorganiza de provinses, cual en la sentenio 11 ia crea multe statos rejional peti. De la sentenio 11, esta statos rejional peti ia comensa cambia a la presedentes de la nasiones european moderna. Esta ia es partal gidada par la inventa de la campo de bancos, la comersia internasional e la asende de la statos comersial como Venezia cual ia controla la comersia de la este. La sentenio 5 es, donec, un punto de comensa usosa per formi la frontera istorial entre la antica e la moderna.

Jeografia



Estende masima de la Impero Roman en 117 EC su la Imperor Traiano.


Europa no es un unia jeografial separada, ma lo es multe facil ce on vide lo como tal, cuando en realia la cultures de Europa flue ultra sua fronteras. La campanianes de Italia o Espania, per esemplo, ia ave plu cualias comun con sua visinas en Africa norde ca con sua correspondentes en Deutxland o England. Simil, partes grande de Europa este, xef Rusia, mostra influes cultural importante de la cultures asian, e los es istorial plu liada con la este ca con la ueste.

Un problem importante es donce la natur porosa de la fronteras jeografial de Europa. En la sude, la paises european de la Mediteraneo es a distantia de un naviga corta de la portos en Africa norde. En la sude-este, Europa es separada de Asia par un canal corta en la Bosforo, e la cultures la plu importante en la rejion, como la Impero Bizantian e la Turceses Osmanian, ia es estendida entre Elas e Turcia. En la este, Europa es separada de Asia par la Montes Ural, e la clima, en loca de la jeografia, es la bari la plu sinifiosa contra viaja entre la este e la ueste.

Sola en la ueste de Europa, con la Mar Atlantica, on vide un parador jeografial clar.

La responde a esta problem es aseta ce trata Europa como un unia separada es alga caprisal. Lo es esensal, en tota istoria, ce on defini la campo de studia, e la trata de Europa como un unia es un forma de reali esta intende. Si on recorda esta, la problem de la jeografia european no es vera un problem. La fronteras jeografial caprisal de Europa no debe sutrae de la atentas de investiga la istoria de rejiones individua en la continente.

Cade de la Impero Roman



Vias prendeda par la invadores barbar de la Impero Roman.

Lo es normal ce on parla sur la cade de la Impero Roman, ma en multe formas esta describe es tro simple, e pote es malgidante. Serta, la stato sentrida governada par Augusto Cesar e sua seguores ia desapare de la

istoria. An tal, la lejes e la lingua cual Roma ia dona a un area vasta de Europa ia persiste en sua influe pos la colasa de la Impero.

La periodo ultima de la Impero Roman ia es plen de tumultas sosial e political. Multe de la tumultas ia envolve la Impero ueste falinte. De la sentenio 3, la Impero Roman ia es su ataca constante par forsas interna e esterna. Tribus cual Roma ia trae nunca su la *Pax Romana* ia vide en la Roma debilida un posible de estende o ataca. La custa de manteni la campas e fronteras la plu distante de la impero ia sinifia ce un armada profesal ia debe es constante mantenida estra la pais, un atenta custosa per cualce pais en cualce periodo. Interna, la militari de la Impero Roman ia sinifia ce la armada ia deveni un forsa political potiosa, e en la stadios plu tarda de la Impero lo ia ave un rol major en la eleje de la Imperor.

An si Roma ia concista la este e la ueste, esta site peti en la colinas alban en la rejion de Latio ia trova ce lo es tro estendida. Con un impero grande la nesesa de estende la sitadania ia nase, e esta ia fa ce la imperores veni de tota la impero en la anios ultima.

Esta tensas a la fibre mesma de la impero ia pone un linia entre la provinses este e ueste. La fato ce la site Roma ia comensa un periodo de declina, e la importa perene de emporta gran de Egipte e otra provinses de la este, ia sinifia ce Bizantio (oji Istanbul e nomida Constantinopoli a ante) es usada per lia la este de la Impero Roman con la ueste. Constantino 1, en un atenta de usa Constantinopoli como representante de la integra completa de la Impero Roman Este e la Impero Ueste Latina, ia comensa nonintendida la rompe de la impero.

Pos la mori de Constantino, la impero en la ueste ia vide un periodo de tumulta cuando la tre fios de la imperor ia luta contra lunlotra per controla Roma. A fini, Constantio 2 ia deveni la sola imperor pos cuando sua du frates ia es asasinada, e ia leva sua cusin Constantio Galo a Cesar de la Impero Este. La impero ia es aora du potias diferente, un fato cual ia formi la istoria de la eda medieval e la curso de cristianisme per la mil anios seguente.

La influe e potia diminuente de Roma ia gida a la retira de la cultur roman cual a ves pasada ia domina la provinses. A tota la provinses roman, la sitadanes nonroman, de ci sua asendentes ia adota Roma como la ase de sua mundo, ia comensa dona plu asentua a sua identias local – galos, espanioles, briteses antica e africanes norde ia pleni la vacua lasada par la parti de la armadas roman, redeclarante sua propre cultur e lejes.

La *Pax Romana* comandada par Augusto ia permite ja ce leges e costumes local domina supra la leges de Roma, si la provinses ta aseta mera ce sua militares e impostas es controlada. En relata con esta, la fini de la Impero Roman ia sinifia ce la provinses es aora libre per organiza sua propre cosas militar e economial. An tal, los no ia dejeta tota cual Roma ia ofre. Latina ia es la *lingua franca* de politica e comersia, e on ia adota zelosa la cualias plu bon de lege roman, spesial en relata con la codigi de leges cual ia deveni alora asedable per la publica e aplicable a tota sitadanes.

Tribus enemini ci ia es repulsada a ves pasada par la armada roman ia pote invade aora tra la frontera roman, coloninte la teras imperial. Esta tribus no ia es stranjer a la cultur roman, car multe de sua gidores e membros ia es en contata constante con Roma tra la macina economial e political de impero. Pos organiza sosias paralel en la rejiones cual los ia invade, lo ia es natural ce los misca se con la popla roman esistente. Esta prosede ia dura tra entre du e tre sentenios e ia resulta un cambia en la composa de la sosia european a interna de la fronteras roman. La parte este, con lingua elinica, ia vide aora Bizantio como sua sentro, e esta divide de la impero ia deveni permanente en la Europa de la sentenios plu tarda.

La plu importante de la atas de Constantino como imperor ia es converti a cristianisme sur sua leto de mori. An si la Impero ia move a Constantinopoli, la papia ia resta en Roma, como consetada par San Pedro, la pape prima. A alga grado la potia papal ia deveni sinonim de la potia de la imperor ueste. La capital secular de la impero ueste ia es Ravenna. La governa debil e la angusa par causa de invade ia gida a la

cade de Roma en 410 par la visigotos. La Impero ueste ia cade en 476 en Ravenna. La impero este restante ia es nomida la Impero Bizantian, per sua capital. Italia no ia deveni denova un stato unida asta la sentenio 19.

Eda medieval

Introdui

La eda medieval ia es un periodo de sirca mil anios de istoria, jeneral asetada como estendente de la cade de la Impero Roman (a fini de la sentenio 5) asta la descovre de America en 1492. Esta periodo ia comensa con un declina demografial en la fini de la Impero Roman, con poplas european diminuente e multe sites e feudos campanial abandonada. Un clima plu fria, maladies e disturbas political ia fa un rol en esta periodo cual ia vide la sivilia mediteranean clasica eclisida.

Traversante Europa, sosias plu peti ia emerji, localida e ibride combinante influes roman, cristian e germanica o celta. En la sentenios 9 e 10 la poplas ia ateni sua minima, e Europa ia deveni xef campanial e a alga grado un rejion retrogradal. Comersia e aprende ia flori en la mundo muslim, en Xina e en Barat en esta mesma periodo. La armadas muslim ia concista Espania en la sentenios 7 e 8, ma ia es vinseda par la rena franco en 732 cuando los ia atenta entra en Frans.

La cambia de la milenio ia vide un crese e ativia renovida, cuando res e sites ia solidi sua autoria e ia comensa popla denova teras lasada vacua par la declina de Roma. Un clima plu calda pos 900 ia permite ce on usa plu tera per produi comedas. La sistem feudal de cultiva, do la campanianes ia es liada a sua feudos par obligas con la seniores local e la eglise, ia furni un grado de stablia economical. Esta ia es aidada par la ariva en Europa de la colar de cavalo de Asia, cual ia aumenta la produis cultural par permite ce la arados es gidada par cavalos, en loca de par boves plu lenta.

La sites comercial ia flori en England, Frans e Nederland. La gidores deutx ia envia monces e campanianes a sutrae la bosces e coloni Europa este e la Baltica. La sites-statos de Italia norde ia ave plu ricia e influe. La Espania muslim ia deveni un sentro de aprende e cultur do

cristianes, musulmes e iudis ia coesiste en amia relativa. An con multe geras local e disputas entre cavalores, la periodo “alta” de la eda medieval, de 1000 a 1250, ia vide un crise de abitores e un ricia sufisinte per construi catedrales grande e envia armadas european estra la continente a la crusadas.

Pos 1250, stania demografial ia emerji. La crese de la cuantia de abitores ia lenti o ia para cuando la limitas de la cultiva medieval ia es atendida. Disputas major entre renas potiosa, como la Gera de Sento Anios entre England e Frans, ia deveni plu frecuente. La eglesa cristian, a ante secur en sua autoria spirital, ia ave fendes e un froda finansial cresente.

La anio 1348 ia vide un desastre cuando la pesta bubonal (la “Pesta Negra”) ia entra en Italia, portata par barcones de Asia. Lo ia estende tra la continente en tre anios, matante un tri de tota europeanes. Multe ia crede ce lo es la fini de la mundo, prediseda par cristianisme. Con sua dole, la pesta ia trae ruina economical, levante la custa de labora e preveninte la continua de la sistem feudal vea, car la campanianes survivente ia despeta la esijes de lo.

La 150 anios seguente ia cambia Europa de un loca de feudos, su un controla laxa par eglesa e res a un colie de statos nasional nova ma plu unida. La vilas ia deveni sentros de resiste e disenti de la autorias real e eglesal. La influes vea de cavalores e nobiles ia declina, e la gidores ia realinia con la burjesia e la mercatores, un clase plu rica. La emerji de la primador e la estende de alfabetisme ia aumenta la disputas relijiosa e political en multe paises. En 1500, Cristoforo Colombo ia traversa la mar a la Mundo Nova, e Martin Luther ia es a punto de defia la autoria de la Papia Roman e sua direto de dona esenta de pecas par intercambia per mone. Esta developas ia abri la eda moderna de la istoria, e ia fini la eda medieval.

Alga instituidas moderna ave sua radises en la eda medieval. La conseta de statos-naciones con un governa sentral forte nase de la solidi de potias par alga res de la eda medieval. Esta res ia crea cortes real, ia

asinia xerifes, ia crea armadas real, e ia comensa colie impostas – tota la consetas sentral en la governa moderna. Un exemplo xef es la rena frances, gidada par la dinastia capetian de 987 asta la temprana de la sentenio 14. La nobiles provinsal frances e sua casteles e cavalores ia es traeda su controla real en esta tempo, e la unia nasional ia es beneficiada. Reversada, Deutxland, cual ia ave res potiosa en la sentenio 10 e en la comensa de la sentenio 11, ia ave en la alta de la eda medieval un serie de disputas political entre la gidores e la eglesa, cual ia debili la coere nasional e ia leva la seniores local a postos de influe grande.

En la eda medieval, la res orijinal ia clama parlamentos per esplica sua politicas e demanda per mone. Parlamentos a esta tempo ia representa la tre clases coletiva – eglesores, nobiles e mercatores – no individuas.

La idea de governa limitada ia apare ance, defiante la idea tradisional en acel tempo ce la gobernadores ave tota la potia (como la imperores roman o la faraones egiptian). La aveni plu sustantial ia es en 1215, cuando la nobiles de England ia espresa sua diretos contra la re John en la *Magna Carta*. En ajunta, la idea de parlamentos, como esplicada a supra, ia apare, e la natur reciproca de la contratas feudal e senioral ia furni la fundas per la conseta de contrata sosial.

En ajunta, la formi de burocratia governal ia comensa en esta tempo, cuando la consilios real de la res medieval ia evolui a la departes moderna de la governa.

A fini, la regula de benes e servis ia deveni plu importante en la eda medieval, cuando la sindicatos ia proteje la consumidores contra produidas inferior.

La pensores de la Renase e la Lumina tende regarda la eda medieval con despeta, ma la eda medieval ia es esensial per fa la labora fundal per la tempos futur.

La barbares uni

En cuando la potia roman ia esflue, tribus de estra la fronteras vea ia entra per pleni la vacua. La visigotos ia institui un rena nova en la penisola iberian, e la vandales ia coloni final Africa norde. En Britan, la tribus germanica ia ariva e ia coloni la costa este en 5 EC. A fini, esta colonistes ia institui renas anglosason cual ia pleni la vacua lasada par la parti de la romanes. La Italia posroman mesma ia cade su la influe de la ostrogotos, de ci Teodorico, la re influente, ia es asetada como imperor nova par la Senado roman, e ia ave bon relatas con la pape cristian, ma ia manteni sua seja de potia en Ravena, en Italia norde. Italia sude e Sisilia ia vive su la influe de la bizantianes per multe sentenios en esta periodo.

La provinse de Galia, cual ia es un de la plu ricas de la provinses roman ueste, ia es concistada par la francos. La sosia galo-roman e sua gidores ia asorbe ultima la francos, dependente de la gerores per securia e fortinte lias de sposi con la clanes franco. La rena franco nova ia inclui multe de Deutxland ueste e la norde de Frans, e sua potia en esta rejion ia es evidentida par la vinse contra la visigotos e otra enemis barbar. La parola deutx per Frans, *Frankreich*, onora la rena franco de la pasada.

La dinastia merovingian, nomida per la re tribal lejendal Merovech, ia es la prima cual ia governa la rena franco. Sua gidor la plu destrosa e potiosa, Clovis, ia converti a catolicisme en 496 pos promete esta si el ta vinse en batalia. A sua mori, el ia divide sua rena entre sua fios, de ci sua compete ia deveni un sentenio de geras interna sanguosa. Algas, como Chilperic, ia es demente, e zero de los ia vole sede sua teras o potia per reuni la rena. La fortunas de la merovingianes ia esflue e los ia desapare, no plu pertinente.

La asende de un potia governante nova, la dinastia carolingian, ia es la resulta de la potia cresente de la *majordomo*, o “xef de la casa”. La res merovingian ia dona a sua *majordomo* un potia estendosa per gida e controla sua statos, e alga de estas ia usa esta potia per comanda e controla teritorios intera. Pepin 2 ia es un de la primas ci ia estende sua

potia tan multe ce el ia ave potia sur cuasi tota Galia. Sua fio Charles Martel, ance un *mayordomo*, ia gania la batalia de Tours contra la armadas muslim invadente, escluinte la influe muslim de cuasi tota Europa. La nom Martel ia es un refere a sua arma elejeda.

La fio de Martel, Pepin 3 la Basa, pos solisita suporta de la papia, ia dejeta la “pupetas” merovingian. La papia ia permite Pepino a suverti la merovingianes per securi la suporta franco per la statos papal, e proteje contra la avansa langobarda. Pepin ia es declarada como *rex Dei gratia* (Re par la grasia de Dio), tal instituinte un presedente potiosa per la asolutisme european, razonante ce lo es la desira de la Dio cristian ce algun ta es declarada como re.

(Ambos Pepin 2 e Pepin 3 ia es conoseda como Pepin la Joven, como Pepin 1 ia es Pepin la Major. An tal, Pepin 3 es ance conoseda como Pepin la Basa e esta es la nom cual nos va usa asi.)

Pepin la Basa ia es la fundor de la dinastia carolingian, cual ia culmina en sua fio Carlo la grande. Carlo la grande ia es la re prima coronida como Imperor Roman Santa (la seguor suposada de la Cesares e la protejor de la Eglesa Catolica). Carlo la Grande, de ci sua impero ia estende par concista per ensirca la plu de Deutxland e Frans de oji, ia crea un forma de renase en la mundo inteletal de la rena franco. Carlo la Grande ia organiza moncerias e ia fa ce la monces copia la Biblia, en manoscritos luminada, en salas nomida *scriptoria*. Per femes, la prepara de stofa ia es un de la poca formas en cual los ia pote estende sua orizones inteletal e fa alga cosa diferente de pari e labora en la campos.

La fios de Carlo la Grande ia segue la tradision germanica pos sua mori e ia divide la rena entre se en la sentenio 9. “Francia” este e ueste ia emerji, cual en la sentenios seguente ia deveni nomida Frans e Deutxland (plu tarda, la ultima ia es conoseda como la Impero Roman Santa).

En esta tempo, la rejiones abitada de Europa ueste ia es plu atacada par la vicinges, grupos de gerores maral de Danmarc e Scandinavia de ci sua dios ia inclui Tor e Odin, e de ci sua atacas contra sites e eglesas

rica european ia es sola un de la cualias de sua redes de comersia, cual ia ensirca la Atlantica e Europa de Newfoundland asta Bizancio. La ativia vicing ia continua asta cuando Noria e Suedia ia aseta esitante la cristianisme en la sentenio 11 e 12. England, Er e Normandia franses ia vide un coloni vicing sustantial en esta periodo, con resultas istorial importante.



Mapa de Europa pos la mori de Carlo la Grande en 814.

En Espania, un rena elejal visigoto ia flori, con disputas constante, asta 711, cuando la plu de Espania ia cade rapida su la invadores muslim. Un impero muslim grande, nomida la Califia de Cordoba, ia flori cultural e par sua armadas. En la montanias de la norde, renas cristian peti como Galicia, Asturia, Navarra e Aragon ia persiste. La frontera con la impero franco, nomida en espaniol *Marca Hispánica*, ia inclui Barcelona de 801 (la orijina de la Prinsia de Catalonia).



La rena de Granada, la rena muslim ultima en Espania, ia es concistada par la Res Catolica en 1492.

La muslimes ia perde sua ultima rena espaniol, Granada, en 1492, cuando la re de Aragon, Fernando, ia sposi la rea de Castilla, Isabel, en 1469. La uni dinastial, produinte la neto Carlos 5, ia manteni la fronteras interna e la nasionalias, lejes e instituidas diferente de cada de la renas antica asta la sentenio 18. Navarra ia es ajuntada en 1515 e manteni ancora sua lejes e propre politica finansial, como Euscadi.

Italia ia comensa separa en renas plu peti, gidada par formas de governa diferente. An tal, la papia ia es capas de eserse fortia grande supra la plu de la popla european.

Europa este, min poplada e plu distante de la fronteras roman, ia esperia multe invades e migras entre la sentenios 6 e 10. De sua propre pais en Rusia sude, la poplas slavica ia estende a ueste seguite la migras germanica, coloninte la Balcanes, Bohemia, Polska e Deutxland este, e distribuinte sua fidas entre la seguores de Roma. La polsces, txescs e corvatscs ia adota la cristianisme latina, ma la res balgarsce, serbsce e rusce ia aseta la rituo elinica bizantian.

La bosnianses, un tribu peti de slavicas sude, ia adota sua propre liturgia e en la sentenio 10 ia institui la Eglesa Bosnian, frecuente confusada con bogomilisme car la res bosnian ia mostra un grado alta de tolera los e ia proteje an los, a veses con resultas trajedial per sua propre modo de vive, e sarta con resultas istorial per la Balcanes intera.

La magiares, un tribu de gerores-cavalores etnical relatada con la hunes, ia entra en Europa de la stepes rusce en la sentenio 9, ia fa un serie de geras contra la imperores deutx ci ia segue Carlo la grande, e ia concista final Magiar como un rena cristian latina (sua re Stefan ia deveni santa). La poplas de la rejion baltica, como la prusenes e latvisces, ia resta nonatacada par la estende cristian en la eda medieval temprana. En Rusia, un rena en Ciev ia es formida, asorbente e poplas slavica e elementos scandinavian.



La Batalia de Hastings. La tapeto imajosa de Bayeux mostra la concista normande de England (sirca 1070).

Britan ia es divideda en renas variiosa pos la invade anglosason, asta la periodo de la invades dansce. La Re Alfredo ia uni la plu de England en

un rena en la tarda de la sentenio 9. A 10 otobre 1066 William la Bastardo, plu tarda William la Concestor, ia comensa un invade normande de England con la batalia de Hastings. La controla franses de England en esta periodo es mostrada par la vocabulo formal en engles, cual veni de franses.

En 1215 la barones de England ia forsa la re John a suscrive la *Magna Carta*. Re John ia es spesial despotin. El ia maltrata sua vasales, ia mata sua sobrin xico Arthur, e ia trae la coleria de la Eglesa a la pais en la forma de la Proibi Papal (no servis eglesal ia es fada: no sposis, funeras o misas). Final, sua barones ia uni contra el. Cuando el ia es xasante, los ia ensirca el, donante a el la eleje de suscrive la *Magna Carta* o mori. La *Magna Carta* ia conserva par leje alga diretos cual la barones ia merita. La potia real asoluta ia sede a un governa par acorda, e la funda de la Parlamento ia es ponedada.

Arte romanica e gotica

Romanica es la nom donada a la stilo arkitetal cual on trova tra Eruopa entre la sentenios 10 e 13. Lo ia empresta elementos de la arkiteta roman antica e bizantian este en un fusa de ricia e usosia. Esta es la eglesas de un relijio cristian rica e estendente. Fatores xef en la arkiteta romanica es la asende de ordinas relijiosa e moncisme, la nesesa de trata congregas plu grande cuando la popla ia crese, la desira per sponsori e recorda como un beneficor cristian, e la nesesa potiosa de construi eglesas cual refleta la belia e potia de emosia relijial.

On no pote duta cuando on entra a la Catedral de Notre Dame ce sua carne corpal es de *terra firma* ma sua spirito parteni a la rena de la sielos. Multe eglesas resta de esta periodo, atestante la developa de metodos nova de construi voltas en petra en loca de lenio. La stilo de la basilica sede a espresas plu alta de arkiteta relijiosa. La arkiteta romanica es desiniada per espresa la potia spiritual e autoria de la Eglesa. Multe casteles ia es comensada en esta tempo e estendida a pos.

La cualias xef de la arciteta romanica es la arcos de testa ronda en fenestras, portes e arcadas, colonas retangulo e silindre, voltas semisilindre, voltas crusada e fenestras duplada. Eglesas romanica tarda ia pote ave voltas costelin. La mures es densa e la contrafortes es plana. Arcos de porte culmina comun con un timpan scultada, spesial de Cristo en gloria. Mures interna porta comun frescos de senas de la Biblia.

La arciteta gotica ia developa de la arciteta romanica en Frans en la temprana de la sentenio 12 e ia estende tra Europa, esente alterada en rejiones diferente. Lo ia dura en alga partes de Europa asta la sentenio 1500. La arciteta gotica, como videda en multe de la eglesas grande e catedrales de Europa, es distinguida par la usa de la volta puntida e la volta costelin. Plu tarda la volta costelin ia deveni multe complicada e ornal, xef en England, Espania e Europa este.

La developa de contrafortes protendente e arcos apoiante ia permite ce la abris en la mures es plu grande e la voltas es plu alta. Colonas ia ave comun un grupo de palos per suporta la costelas e moldures a supra. Portes e fenestras ia ave arcos puntida. La portes ia es frecuente locada en portones rica siselida e ensircada par scultas nonastrata. La fenestras ia deveni plu grande e ia es completida par traseria suportante la vitro. La vitro colorida ia deveni un forma artal plu importante ca fresco en tota Europa estra Italia.

Orna de manoscritos ia es un forma artal major en la tarda de la eda medieval. Ma manoscritos ia es copiada par mano, frecuente par monces laborante en la *scriptoria* en la moncerias. La libros cual ia es tal produida ia es frecuente *luminada* (decorada con imajes e bordas ornota). Frecuente la letera prima de un paje ia es ornota con color e senas peti. La stilo de decora ia developa cualias local, variante de la bordas florosa e astrata asta la vistas detaliosa e senas a interna de la *Très Riches Heures* de la Duc du Berry par la frates Limbourg.

Poesia e musica ia es portada entre sites par musicistes viajante, nomida menestreles. Esta menestreles ia dona novas de tota Europa

cuando los ia viaja e ia presenta naras e cantas. Un de la poesias germanica la plu longa, *Beowulf*, nara la mata de un bestia jigante ci pesta un vila. Otras de esta epicas ia es la *Canta de Roland* (fundida sur la ataca contra la soldatos retro de Carlo la Grande par la euscaras cuando Carlo ia gida sua omes a estra Espania).

Potia papal en la eda medieval

La papia ia es un instituida potiosa en la Europa medieval. Relijio ia permea tota la aspetas de la sosia e ia aplica egal a la re como a un cultivor. En Europa medieval, la pape ia es la ajente de potia e la reconsilior, con un autoria spirital enorme en un eda cuando la esiste de sielo e inferno ia es constante esaminada, como ance la via de on a los. La cortia de la vive, maladies, mortalia de enfantes e pestas ia ajunta a la preocupa con mori e la spirito eterna; fida ia es la medica de la mente medieval. La papes ia asinia bispos, ia reseta desis, ia proclama leges canonal tra la mundo cristian. Los ia pote clama per crusadas contra cualce enemis de la mundo cristian, levante armadas gidada par la res e cavalores de Europa.

Esta debe es videda en contesto, considerante la *natur* de la potia papal. La potia real ia deriva de posese de tera, cual ia es esensial per leva armadas de cavalores. La papia ia ave min ativas direta, e per complica la cosas, esta no ia pote es pasada par erita. Esta ia sinifia ce un pape prosima a mori ia pote rici sua familia sola par dona la propria de la eglesa, tal reduinte la ativas de la corte papal en loca de grandi los. Donce, la pape ia debe depende de otra formas de potia, e sua autoria spirital ia es sempre un alternativa a controla teritorial direta.

La pape ia atenta controla Europa par metodos political. El ia presa multe res afin los pone sua bispos en postos nonrelijial potiosa. En responde a esta, la res european ia deside pone sua propre bispos en postos relijial en un prosede nomida asinia de eglesores (*investitura*).

La imperor Henrico 4 ia vende multe bispas asta cuando el ia atenta despone Gregorio 7. En responde, Gregorio 7 ia esclui el e ia sutrae la

encarga de sua vasales a el. Henrico ia atenta manteni sua rena unida, ma, contra un popla colerida e asustada per sua spiritos, el ia vade a la monceria de Canossa en la Alpes per suplica la pape a remete el, stante estra la murenes con pedes nuda en la neva ante cuando Gregorio 7 ia sede e cansela sua esclusi.

Tra anios, la pape e la Impero Roman Santa ia disputa sur la asinia de eglesores asta cuando Pape Calisto 2 e la Imperor Roman Santa Henrico 5 ia esecuta la Acorda de Worms, cual ia dona a la pape la autoria de pone bispos en postos relijial e a la imperor la autoria de pone bispos en postos nonrelijial. Esta luta, cual ia fini con la Acorda de Worms, ia es nomida la Controversa de Indui.

La aspetas asteninte de Cristo ia es sempre ja comun en la vives de la cristianes; de San Augustino a San Fransesco la introspecta inteletal e la rejeta de luso ia atrae sempre los ci xerca es plu prosima a Jesus. Esta retira a un comunia comun ia esiste en Asia sude-ueste a la nase de cristianisme. La seta iudiste ci ia asconde la Enrolas de la Mar Mor en cavas ia es sola un de la multe comunias asteninte ci ia dedica se a la vive relijiosa.

La periodo medieval ia vide la developa de ordinas asteninte con moncerias a sua sentros. Ordinas nova ia es formida per segue alga intendes relijiosa. San Benedicto ia es la prima ci ia comanda un modo en cual tota ordinas debe funsiona. La ordina benedictin ia segue rituos multe spesifada. Entre estas ia es tempos esata per cada prea; on sujesta ce esta ia gida a la developa de la orolojo sirca la tempo de la Consilio Cuatro de Laterano. Esta Consilio ia institui regulas de adora per tota la ordinas moncal, regulas fundida en los de la sistersianes.

Citaeux, la padre de la ordina sistersian, ia uni tota la moncerias en un “Ordina”, ma ia permite ance ce los ave sua propre cualias rejional. La monces no ia developa sola la politicas inteletal de la Europa medieval, ma ia aida ance par ofre comedas e servis a la povres.

Sosia en la eda medieval

La sindicatos, ci ia controla ci ia pote o no ia pote labora en un profesia par educa e integra vertical, ia es la forma prima de universias. Entre los ia es la universias de Salamanca, Paris e Bolonia. Scolastica, un filosofia de educa cual ia asentua la instrui de la Biblia e Aristotele, ia es la forma comun de educa. La Renase ia trae umanisme e la artes liberal.

La sites ia comensa formi un loca per la botecas e la sindicatos. La sites ia es nesesada como sentros per comersia, e multe de la sites medieval famosa de Europa ia es portos. En esta sites, mone e capitalisme ia comensa flori. En la norde, la *gilder* ia deveni un mone potiosa e cuasi universal. La europeanes ia reabri ance vias de comersia nonativa con Xina e Asia sude-ueste. La Via de Seda ia es denova usada, e la periodo de esplora e descovre de Europa ia intende trova vias plu rapida e fasil per vade a la este.

Avansas en cultiva ia es aparente. Campos ia deveni aradida par grilias grande de metal, tirada par bestias. La europeanes ia comensa ance lasa campos reposante per permite ce nurintes reveni a la solo de tera, tal comensante la conseta de alterna de cultiva. La sistemas de feudalisme e seniorisme ia crese con la metodos nova de cultiva.

Feudalismo, la ramo political de la sistem senioriste, ia organiza la sosia en un strutur piramide, con seniores governante, e sua vasales a su. Un vasal ia reseta tera e, par intercambia, ia proteje e responde a los supra se.

La seniorisme, la fini economical de la sistem, ia es la forma en cual esta proprias grande ia es manejada. La vasales ia cultiva la tera e ia comersia la gran a la senior per reseta proteje, asede a reservas, un molin per mole la gran, e asede a fornos per forni pan produida de esta gran. Tal la comeda ia es furnida. An tal, farina molinida de gran medieval ia es frecuente bruta e dur per la dentes. La fontes de acua ia es frecuente contaminada, donce la gran ia es usada per prepara ale,

cual ia es la bebida xef de la europeanes norde, contra ce la vino ia resta la eleje de la europeanes de sude.

Formas nova de arte

E depinta e leteratur ia reseta un esplode nova de vive cuando la temprana de la eda medieval ia fini.

Depinta

Giotto ia comensa espresa plu realiste la forma umana. An si sua formas pare primitiva en compara con los de la artistes de la Renase, el ia es la prima ci ia atenta retrae la realisme de la arte roman. El ia comensa developa tecnicas de perspetiva en depintas per ateni profundia. La plu de sua arte ia es en la forma de frescos de jeso en la muros de eglesas e eglesetas.

Leteratur

Quando la prestijia de la Papia ia comensa declina, la consensia nasional ia comensa aumenta; esta nasionalisme ia apare en leteratur scriveda en linguas nasional o demotica, en loca de latina. Esta usa de demotica ia abri tal ce cualias cultural local ia pote es espresada en formas plu natural. Esta ia permite ce leteratur pare plu realiste e umana a la lejores, e lo es par causa de esta ce obras como *La naras de Canterbury* es considerada como representas de vive en la tempo en cual los ia es scriveda.

An si la alfabetisme de nonrelijiosas ia crese como resulta de la scrives demotica, la sosia ia es ancora fundida sur la cultur bocal.

Dante Aligheri ia nase en 1265 en Firenze, Italia. Sua familia no ia es rica ma ia es considerada como un linia aristocrata. El ia es enseniada par Brunetto Latini, ci ia ensenia a el la arte libral clasica, incluinte latina e elinica antica. An tal, Dante ia abrasa sua lingua demotica e ia

comensa scrive *La comedia divin* en sua dialeto toscan. Oji, el teni un loca en la istoria como la autor prima ci ia fa esta.

Alighieri ia considera sua obra como un comedia par causa de la diferes entre la stilo de scrive italian e la grande trajedia latina. Sua epica en tre partes ia critica sarcasmosa la Eglesa, e ia comenta sur individuas variosa istorial e contempora. La figur la plu importante es Verjilio, la poesiste latina, ci ia ave un rol en gida Dante tra la vive pos mori.

La emosias personal de Dante a multe persones es ance evidente en sua obra. En la strato la plu profunda de la enferno es Bonifasio 8, un pape de ci el ia oposa sua politica de estende. Cada parte de la poesia representa grados de salva: la Enferno, la Purgatorio e la Paradiso. La Enferno inclui multe arcetipos de la enferno como la rio Stix e la navetor Caron ci naveti la spiritos de la mores a traversa de la rio.

La naras de Canterbury par Chaucer ia esposa la interesas mundal de engleses variosa. Esta colie de naras ia es situada en un strutur fundida en un viaja peregrinante a la santeria de San Tomas Becket en Canterbury. La naras es racontas individual de tredes persones de esta peregrina. La naras varia de un relata romantica, tra familia, asta religio, furninte un talia traversal de la sosia en acel tempo.

Un proportio grande de la popla, e donce un proportio grande de la carateres, ia pare plu focada a la plaser material ca a sua spiritos eterna. *La naras de Canterbury* es ance usosa per studia la engles demotica de acel tempo. Lo es un esemplo clasica de engles medieval cual la linguistes ci studia England de la edas medieval e moderna temprana continua usa asta oji.

La Gera de Sento Anios (1337–1453)

Jeanne d’Arc ia gida un armada franses contra la engleses en la Gera de Sento Anios e ia susede para la avansa engles. El ia es caturada par la engleses cuando los ia es en batalia, e ia es portada a Rouen per sua prosede legal.



La Gera de Sento Anios ia es un gera multe complicada entre Frans e England (con la interveni de ves a ves de otra paises), sur tre disputas xef:

- ◆ la controla de la rejion de Gasconia en Frans;
- ◆ rebelas suportada par Britan en viletas franses cual produi stofa;
- ◆ la reclamas engles a la trono franses pos la mori de Charles 4.

La gera, orijinal comensada par un disputa sur ci va deveni la Re de Frans pos la mori de Charles 4, ia evolve rapida a un gera complicada e multifasetal. Re Eduardo 3 e sua fio Eduardo, comun conoseda como “La Re Negra”, ia invade Aciten, un rejion enorme en la sude-ueste de Frans, reclamada par England. Con la pasa de tempo, la res de England

e Frans ia envolve se en multe operas, incluinte un gera interna en Bres, disputas comercial en lo cual va deveni Beljia, e an un gera en Castelia.

La tre batalias xef de la Gera de Sento Anios (Crécy, Poitiers e Agincourt) ia es vinses vasta per la engleses, cadente la flor de la nobilia franses en cada batalia. An tal, an si la engleses ia gania cada batalia xef e multe petis, un England relativa povre ia pote nunca domina Frans sude, la rejion la plu rica de Frans, cual ia gida final a la perde de la gera par England.

La asende de la sites e la comersia

De la sentenio 6 a la sentenio 10, on ia ave poca sentros de comersia e sola clases peti de mercatores en Europa. La comersia de distantia longa ia es frecuente focada a la benes de luso per la nobilia e la elites de la eglise, e ia es arbitrada par mercatores viajores como la suris o la iudis. La artesanía ia es local fada en feudos. La popla no ia es sufisinte grande per suporta plu developas economical, e la atacas vicing e arabi ia fa ce la vias de comersia es perilosa.

En la alta de la eda medieval, 1000–1500, la comersia de distantia longa ia deveni plu secur e tal plu profitosa. Como resulta, la artesanes ia move a la sentros cresente de comersia, obligante la seniores e serfos a oteni sua benes de esta sentros. La vilas ia formi alias e federas urban, o comunias legal, cual ia labora juntada per luta contra la crimines o trata monarcas e nobiles. La sindicatos ia apare ance, permetente un supravide coletiva de la consernas – la labora ia es fada par persones fidable, e la sindicatos ia dona educa profesal. La spirito de la economia medieval, an tal, ia preveni compete.

La asende de la vilas ia ave un efeto librinte. Los ia forsa la seniores a ofre termas plu libre a la campanianes. Frecuente, la campanianes ia gania sua libria par intercambia per un paia anial a la senior. La posiblia per un cuantia grande de persones de move se de laboras cultural a industrial en la vilas ia aselera la economia. Vera, un spesie

de revolui industrial artisan ia aveni en la sentenios 12 e 13, spesial en Nederland do la sentros grande de fabrica de stofa como Ghent e Bruges ia cumula multe ricia e ia stimula crese en Europa Ueste jeneral. La Hansa, un alia en la Mar Norde entre sites comercial norsce e baltica, ia emerji en esta periodo, abrinte la recursos scandinavian per furni pelo, lenio, sira de abea e pexes a Europa.

La alta de la eda medieval ia vide la reveni de la europeanes de la Crusada en Asia sude-ueste, do los ia developa preferes per benes no produida a casa. Esta revenores a casa ia introdui a la europeanes medieval la spises esotica, seda, frutas, drogas e otra produidas de la este a la ves prima. Sites sirca la Mediteraneo ia partisipa en la comersia cual ia developa, con ce Venezia ia deveni la porto la plu rica per entra de benes asian, la base de do Marco Polo e sua acompaniores ia parti en sua viaja a Xina.

Crese de monarcias nasional


En esta mesma periodo, la monarcias ia comensa crese, e como resulta la poplas ia comensa vide la crea de nasiones-statos unida. La res ia envia comandas dirijente e ia comensa institui la cortes real, e los ia vive de la mone de la feudos cual los ia posese e de la paias de la vasales. La consilio real de la re ia es un grupo de vasales ci ia consela la re sur temas de stato, cual ia resulta la crea de la departes fundal de la governa. Cuando la representores de la sites ia comensa asembla, esta ia es un formi temprana de la parlamentos fundal.

Esta parlamentos no ia ave la capasia de comanda a la re, ma ia pote fa cexas e la re ia pote ata seguente los. Esta ia es un spesie fundal de legi.

En ajunta, la formi de esta parlamentos ia gida a la institui de la tre stratos sosial: la strato prima, cual ia inclui la eglesores; la strato du, formida par la nobiles e la propriores de tera; e la strato tre, de la burjeses de la sites constituida. England ia ave du parlamentos: la *House of Lords* (Salon Alta) e la *House of Commons* (Salon Basa). La

House of Commons ia permite ce la proprios minor de tera deveni membros.

La pesta negra



Estende de la Mori Negra en Europa.

La pesta bubonal o pesta negra, ia ariva a Europa en 1347. Prima comunicada par pulgas e ratas, la bacteria *Y. Pestis* ia ruina la continente, matante un tri de la popla en 1351. On crede ce la bacteria ia es endemica entre la rodentes en la stepes asian, e ia salta a la umanas en Europa con nosivia grande. La comensa de la maladia ia es subita, e sua sintomes ia es febre, debilia, delirio, maladia de pulmon, e

bubones (inflas de color oscur) a la axila, colo e inguin. Multe frecuente, la infetadas ia mori pos un o du dias, incluinte individuos joven e sana.

Causas de la pesta

La revive de comersia e intercambia ia aumenta la potensia per la sperde de maladies comunicable. Europa no ia sufrir un pesta continental pos la pesta de Justiniano en 535, e la popla nonespasada de 1348 no ia erita imunia. An si la ricia ia crese, la nuri e ijenia per la plu europeanes ia es multe debil en compara con normas moderna, diminuente la resiste imune en jeneral. Multe adultes ia sufrir cuando los ia es enfantes en la Famia Grande de 1316–1321, cuando anios de clima fria e umida ia causa ce la granes ia fali tra la continente. Esta esperia en infantia ia compromete sua resiste a la pesta plu tarda.

On crede ce la pesta ia es traeda a Europa en la ataca mongol sur Kaffa (a la Mar Negra); cuando la maladia ia forsa la mongoles a abandona sua ataca, los ia lansapetri alga vitimes de la pesta a en la site ante parti. Esta ia deveni un pratica comun per la europeanes en asejas de casteles. De ala, mercatores ia sperde la maladia a Constantinopoli, de do lo ia estende tra Europa, prima par barcon a portos mediteranean como Messina e Genova, e a pos par tera en tota dirijes.

Un manca de lenio combustable, par causa de talia la forestas per cultiveria, ia resulta la clui de la banierias cual ia depende de arde lenio per caldi la acua. Spesial en inverno, sola la ricos ia pote compra banis. Esta ia contribui a la state povre de ijenia. La sites ia es multe mal desiniada per ijenia. La sitadanes normal ia lasa dejetadas sur la stradas cual ia atrae ratas, e donce pulgas. La persones ia abita multe prosima a lunlotra, tal ce la pulgas ia nesesa viaja tra distantia longa per infeta otra persones.

On ia culpa multe cosas como la causa de la pesta, spesial la iudis ci ia es la portaculpas xef. An la gidores de la sites ia declara ce membros de

la comunia iudi ia veneni la furni de acua, o ia pone un balsam venenosa sur la portones de la site.

Lo es importante ce on sabe ce la europeanes no ia comprende la causa vera de la pesta. Per los la pesta ia es un maldise traeda a los par sua manca de relijiosa, o par la falis de la eglesa, par la poplas iudi de la sites o an la posa de la stelas. Otras ia atribui la pesta an a mal aira. Per combate lo, los ia porta telas de testa o bolsas de “bonodorintes” cual los ia pote teni sirca sua nases cuando nesesada (la opina de la scola medical xef de Europa, en la Universia de Paris, ia es ce la eruta ia es causada par un alinia astrolojial nonfavorable en 1345). Sin la fatos vera, multe atentas par la europeanes per supresa la maladia ia aida lo a sperde.

Respondes a la pesta

Alga persones ia crede ce la pesta es un puni par Dio contra pecores. La autoflajelores ia apare como resulta. Los ia bate se per sangui, ia prea per pardona, e ia demanda ce sua congregas repenti. Vagante tra Europa sentral (cual ia es colpada par la pesta), multe grupos de autoflajelores ia deveni banditos. La sites e la seniores feudal ia proibi los o ia atenta an elimina los. En ajunta, violentia contra iudis ia eruta, e folas ia mata tota ci ia refusa es batizada. Multe iudis ia es forsada a abandona sua casas.

Dotores medical en Europa medieval ia usa un misca de metodos de proba e era e fontes elinica o roman per cura sua pasientes. Sin conose microorganismes, o la rol de ratas e pulgas en sperde la maladia, la dotores medical no ia pote cura la vitimes infetada o limita la sperde. Como resulta, la maladas ia survive o mori seguite la state jeneral de sua sania, e cualce resiste jenetical cual los ia ave acaso.

Resultas de la pesta

La multe moris ia dona plu oportunes per avansa en sosia, e, como resulta, la proprios ia fa plu sedes per oteni cultivores-luores nova. La

furni de laborores ia cade, resultante un aumenta de salario de la laborores. Un demanda per gran basa ia resulta un cade jeneral de la custa de gran. La nobiles ia perde un parte de sua ricia, e ia deveni plu dependente de monarcas e gera per revenu e potia.

En ajunta, la pesta ia resulta un boni de la nivel de vive per la campanianes e la popla laborante urban. La campanianes e artesanos ia ave aora plu lusos e un dieta plu bon, e la produi ia cambia de fabrica per un mercado coletiva a un mercado lusosa peti. An tal, la nonegalia monal ia crese, car min persones ia posesese proporial plu mone.

A fini, la europeanes ia vide ce prea no cura la pesta, e ce an la gidores de la eglesa ia mori. Esta ia causa ce la popla perde sua fida a la eglesa e ia abri la porte per multe promoves relijial nova e local cual ia es supresada a ante, un fator cual ia aida prepara la veni de la Reformi a un sentenio plu tarda.

Defias a la autoria spiritual a la fini de la eda medieval

La eda medieval ia furni multe de la fundas de la Reformi de la sentenio 16. En esta tempo, la eglesa ia furni ordina, stablia e un struktur per la mundo medieval. La funda la plu esensial de la vive medieval ia es la salva relijial – e la ojeto de vive ultima per tota persones ia es oteni lo. Cuando la popla ia perde sua fida a la eglesa e sua capasia per furni la salva, la eglesa ia comensa perde sua controla de la popla.

Pesta

Como esplicada a ante, la pesta ia contribui a la perde de fida de la persones en la eglesa. An tal, alga de la credores plu zelosa ia regarda un tal pesta como enviada par Dio per puni la mundo per sua pecas. La eglesa ia ave un rol en acel idea per coraji un fida plu zelosa e per ataca cualce disentores.

Promoves erese e popla

Multe promoves e persones ia defia la autoria de la eglesa a la fini de la eda medieval.

La spiritos libre ia crede ce la eglesa no sasia la nesesas spiritual de la popla, e ia promove la misticisme, o la crede ce Dio e umanas ave la mesma esense.

John Wycliffe, un prete engles e profesor en Oxford, ia fundi lolardisme. La lolardos ia razona ce la salva no nesesa veni tra la pape, e ce la re es superior e plu importante ca la pape e relijio. El ia dise ce lo cual es importante per la relijio es leje la Biblia e prea, no la interprete par la pretes. El ia es la prima ci ia tradui la Biblia a un lingua demotica en loca de usa la Biblia latina. El ia critica la ricia de la eglesa e de la eglesores.

Jan Hus, fundor de la husistes, ia atenta reali reformis como los atentada par Wycliffe en England. Hus ia es un prete en Bohemia cuando el ia aprende la ensenia de Wycliffe. An si la persones sirca el ia pensa ce lo es erese e ia proibi lo, Jan ia pensa ce lo debe es enseniada. Par sua desacordas e interatas, Jan ia conclui ce la Eglesa es malida e ia lasa sua propre pais per scrive *Sur la eglesa*, un obra cual ia critica la forma de maneja la eglesa.

Sua ensenias ia apela a la folas, e el ia developa un grupo de seguores conoseda como husistes. En 1413, Hus ia es invitada a un consilio cual ia es creada per reformi la eglesa, ma cuando el ia ariva, el ia es arestada per sua ideas. La prosede legal ia es fada mera par causa de costum, car el ia es culpable de la comensa. Hus ia es ardeda a pira a 6 julio 1415.

Froda en la Eglesa

Ance la froda vasta en la Eglesa ia gida a dutas e demandas sur sua autoria. La ricia suprafluente de la eglesores e la frecuentia a cual los ia ave concubinas e enfantes estra sposi ia es un conserna major. La popla

ia demanda ance sur la vende de pardonas (la reseta de paiaes per pardona de pecas); netisme, simonia, o la vende de postos de la eglesa, pluralisme (ave multiple postos eglesal a la mesma tempo), e la lusosia estrema de la catedrales.

La Fende Grande

En 1305, la re de Frans ia invita la pape a move la seja de la Eglesa a via de Roma, un site pestada par partitos local lutante entre se, a Avignon en la Vale de Rhone. Pos la reveni de la papia a Roma con Pape Gregorio 11 en 1377, un eleje ia es fada per la pape nova. La sitadanes de Roma, esijente la eleje de un pape italian, ia forsa la cardinales a eleje Urbano 6. La cardinales franses dissentinte ia reasembla en Avignon per eleje sua propre pape, Clemente 7. La papes franses de la Fende Grande, ci la istoristes nomi antipapes, ia ave potia papal en alga rejiones de Europa, e tra 39 anios on ia ave du papes.

En un atenta de reconsilia esta fende, on ia ave un confere en Pisa per eleje un pape nova, ma lo no ia pote despone ambos papes, resultante un divide de la papia a tris. No volente sede, la confere de Pisa ia eleje ancora un otra pape, con la mesma resulta.

A fini, la Consilio de Constanz (1414–1418) ia demanda per la renunsia de la tre papes. Con la suporta de la Imperor Roman Santa, la tre papes ia es desponeda e Martin 5 ia es elejeda como pape, fininte la Fende Grande. La Consilio de Constanz ia ata ance contra Joan Wycliffe e Joan Hus, du reformistes en la Eglesa Catolica.

Eda moderna

La eda moderna comensa en 1492 con la descovre de America (an si alga istoristes considera ce lo comensa en 1453 con la concista de Constantinopoli par la turceses) e fini en 1789 con la Revolui Franses. La eda moderna ia trae cambias variosa en relata con la eda medieval presedente. Estas ia aveni de la media de la sentenio 15, e la plu importantes ia es la seguentes: la desapare de la Impero Bizantian (1453); la estende de la mundo conoseda con la descovre de America (1492); la sustitui de statos autocrata per la monarcias feudal; la nase de mercatalisme; la reformi protestante comensada par Martin Luther (1517) cual ia divide cristiania; la apare de umanisme (sentrida en la umana); e la nase en Italia de un stilo artal nova nomida la Renase.

Cambias economical e sosial

La cambias demografial

La popla european ia recovre de la crise de la fini de la eda medieval e ia pasa entre 1500 e 1600 de 80 a 150 milion persones, par causa de la boni de recolies e la diminui de la pesta. La atas cultural ia es estendeda par la bon recolies e la inisia de teras nova. La ativia urban ia ateni un developa notable, como en artisania, cual ia aumenta sua produi.

La apico de comersia

Comersia ia ateni sua apico par causa de un aumenta de demanda e la abri de vias comercial nova, orijinante la mercatalisme.

La intende jeneral de mercatalisme ia es ce la politicas mercataliste rici la economia, creante en esta modo sitadanes rica, revenus par impostas plu alta, e a fini reservas per finansia la militar e la gera. En la sentenio

de 1600, la politica mercantilista es adoptada por la plura de las naciones europeas.

Para exportar mas bienes que se importan, un pais necesita un flujo de oro e plata. El gobierno debe fundir colonias, ganar materiales crudos, y la nacion debe vender bienes terminados a la colonia. El gobierno debe poner tarifas externas altas, tal como para mantener fuera bienes competidores de otras naciones y proteger las fabricas nativas, tal como para obtener mas dinero para el gobierno. El gobierno debe reducir todas las tarifas internas, manteniendo la movilidad de bienes libre dentro del pais. Al fin, la nacion debe ser autosuficiente en todas sus necesidades.

Las vias comerciales son:

- ◆ La comercial mediterranea, que se pierde su rol principal por la amenaza turca y la importacion creciente de otras vias.
- ◆ La comercial atlantica, que se convierte en un desarrollo importante por la forma de los imperios portugueses e espanoles.

La transformacion social

Sociedad es todavia dividida en estratos, pero se experimenta transformacion:

- ◆ La nobleza y la realeza es su control de la potencia real, aunque si ellos la continuan favoreciendo.
- ◆ La burguesia se convierte en el grupo ascendente por su relacion con el comercio, negocios y banca.
- ◆ Los cultivadores son libres de serlo.

Renase



David, par Michelangelo.



Mona Lisa, par Leonardo da Vinci.

La Renase italian de la sentenios 13 e 14 ia estende tra la resta de Europa, representante un tempo cuando Europa ia atenta conose la mundo antica e ia sorti de la Eda Oscur. Esta pote es videda en un interesa renovida a siensa e esperimenta, e un foca a la importa de bon vive en la presente, en contrasta con la vive pos mori como promoveda par la Eglesa.

La Renase ia trae un esplode en arte, poesia e arciteta. Tecnicas e stilos nova ia developa cuando la formas artal ia move a via de la stilos plu fria e oscur de la eda medieval. Esta periodo, seguente esta punto de vista, representa Europa emergjinte de un periodo longa de nonprogresia e la asende de comersia e esplora. La Renase italian es frecuente eticetida como la comensa de la epoca “moderna”.

An tal, lo es importante ce on reconose la instituidas moderna nonlimitada cual ia ave sua radises en la eda medieval, como la nasiones-statos, parlamentos, governa limitada, burocratias e regula de benes e servis.

Orijinas

En la tempo seguente la Pesta Negra, cual ia diminui en 1351 par coaveni, la fida a la potia e importa de la Eglesa ia desende. La multia de moris (sirca 25–30 milion entre 1347 e 1351) ia sinia la nesesa de un revive en educa e sosia en jeneral. Un diminui de la cuantia de laborores ia gida a esije un aumenta de salarios, e tal revoltas ia aveni en paises variosa tra Europa, xef en Deutxland, Frans e Italia.

La Renase ia comensa en Italia norde en la temprana de 1300.

An si lo no ia es nonevitable, fatores variosa – nasionalisme (causada par un orgulo aumentada en la dias de Roma temprana), la crusadas, revive de comersia – ia aida reali reformi. En tota partes de Italia (plu esata Firenze, Genoa, Roma, Napoli e Milano), eruditas ia revive sua studias de leteratur latina e elinica temprana, derivada de manoscritos arcivida.

Pos examina esta obras temprana, los ia persepi ce cultur es esensal per vive un vive sinifiosa, e educa (spesial istoria) es importante per comprende e la mundo de ier e la tempos moderna, como ance per intui la futur. Tal, la eruditas italian ia demanda per un “Renase” en educa e cultur european.

Umanisme

En esta eda, un promove nova ia apare, nomida umanisme. Sua cualias xef es:

- ◆ Amira de la cultur de Anticia clasica.
- ◆ Desira de pone humanas a la sentro de la mundo, contra la teosentrisme medieval.

Umanisme ia ave tre corentes:

- ◆ Letatural e filosofial – dedicada a tradui e studia testos clasica, e promove linguas nasional. On pote nota Pico della Mirandola e Machiavelli.

- ◆ Relijial – atentante uni sua amira per pensores clasica con relijio. On nota Erasmo de Rotterdam e Thomas Moore.
- ◆ Siensal – sentrida en esplica natur tra razona e experimenta. On pote nota Nicolas Copernico, ci ia formula la teoria de eliosentrisme e Andres Vesalio, renovor de medica.

Umanisme ia estende tra Europa par la fundi de academias, la viajas de la umanistes, e la inventa de la primador par Gutenberg (1448). Esta ia permite aumenta la produi de libros e estende la sabe entre un popla plu grande.

Alga umanistes importante es:

- ◆ Francesco Petrarca (1304–1374) ia es un erudita e poesiste italian e un umaniste temprana. En sua sonetos, el ia crea imajes de persones real con personalia, desvalidinte la conseta tipal medieval e la stereotipos de persones.
- ◆ Giovanni Boccaccio (1313–1375) ia scrive *La decameron*, un istoria corta sur la vives de persones vivente en la tempo de la Pesta Negra. La libro foca a la respondes de la persones a la pesta en loca de la coleria de Dio. En esta modo, la libro no conserna relijio, ma la persones, un conseta relativa nova en acel tempo.
- ◆ Pico della Mirandola (1463–1494) ia es un erudita e filosofiste italian de la Renase. El ia scrive *Sur la dinia de la umana* cual ia deveni conoseda como “Declara de la Renase”. En esta, el ia esplica ce umanas ave potensial nonlimitada, e, usante sua volunta libre, pote deveni cualce cosa cual los vole es. El ia razona ce la umanas debe usa sua capacias e no malspende los. A fini, el ia esplica ce la popla debe vive con virtua, o “la cualia de es un om” – forminte sua destina, usante tota sua oportunes, e laborante combatosa tra vive.

Mutas political

La nase de monarcias autoritar, cual ia sustitui per la monarcias feudal de la eda medieval, ia aveni en la comensa de la eda moderna.

En la monarcias autoritar, la re ia forti sua potia, orijinante la Stato moderna. Teorias political nova ia defende la forti de la potia de la re, como los suportada par Machiavelli en sua obra *La prinse*.

Per forti sua potia, la monarcas ia usa utiles variosa:

- ◆ Los ia uni la territorio de sua renas.
- ◆ Los ia boni la maneja, creante un burocratia de servores publica su sua comandas, e ia institui impostas cual ia dona a los fontes de revenu.
- ◆ Los ia promove un armada permanente per la re.
- ◆ Los ia organiza relatas internasional, par diplomatia e ambadores ci ia representa la interesas de la monarcia.

Relijio

Cambias relijial: Reformi e Contrareformi



Martin Luther, monce ci ia comensa la Reformi.

En la sentenio 16 la reformi protestante ia aveni, un promove relijial contra la Eglesa Catolica. Acel reformi, provocada par la desonora de la pretes, ia ave tre corentes xef: luteran, calviniste e anglican.

La reformi luteran ia es comensada par Martin Luther (1483–1546) en Deutxland, ci ia rejeta la vende de pardonas e ia crea prinsipes relijial nova. Estas ia suporta la prinsipe de pardona par “sola la fida” e no par bon atas, la interprete libre de la Biblia, la redui de rituos santa a la batiza e la eucaristia, e la supresa de la culto a la Virjin e la santas. La crede luteran ia estende tra la statos deutx e Europa sentral e norde.



Jean Calvin.

La reformi calviniste ia es predicada par Jean Cauvin (1509–1561) e ia es fundida sur predestina. Esta prinsipe crede ce persones es predestinada par Dio a salva o condena. La crede ia estende tra Nederland, Frans e Scotland.

La reformi anglican ia es promoveda par Henrico 8, ci ia rejeta la obedi a la Pape per divorsa sua sposa. Henrico ia proclama se como testa de la eglesa de England (1534) e ia confisca la benes de la moncerias. Sua crede no difere multe de la catolica.

La reformi catolica o Contrareformi

Par causa de la estende de protestantisme, la Eglesa Catolica ia comensa sua propre reformi, conoseda como la Contrareformi. Sua utiles ia es la Consilio de Trento e la Compania de Jesus.



Encontra de la Consilio de Trento.

La Consilio de Trento (1545–1563) ia validi la prinsipes catolica, manteninte la nesesa de bon atas per salva, la sete rituos santa, e la culto a la Virjin e a la santas, e ia adota medias como la crea de seminarios per instrui plu bon la pretes.

La Compania de Jesus, fundida par Ignacio de Loyola (1540), ia ave un vota de obedi spesial a la Pape, e ia dedica se a predica e educa jovenes.

Geras relijial en Europa

En la periodo entre 1524 e 1648, Europa ia es sufrinte la geras de relijio. Lo es importante ce on reconose, an tal, ce en cuando relijio ia es donada como la causa xef de la gera, multe otra causas ia esiste. Estas ia inclui tera, mone e economia, potia political, recursos natural, e otras.



La masacra de San Bartolomeo, cual ia aveni en 1572, en cual la catolicas ia mata la ugonotes. La masacra ia comensa a la note de la 23-24 agosto e ia dura tra alga semanas.

Esta geras ia inclui la Gera de Campanianes de 1525 en la Impero Roman Santa, la Gera de Smalcalda entre 1546 e 1555, un luta entre la Impero Roman Santa e la turceses, la Reconquista de la espanioles contra la muslimes, la rebela husiste, e misionores e concistores contra la americanes orijinal.

Gera

La luta relijial e la gera ia estende con la protestantisme. La prinsipes nova revoluinte en Deutxland ia fa ce otra tensas sosial esplode; revoltas campanial ia eruta en 1525, resultante caos e versa de sangue tra Osteraic, Suiz e Deutxland sude. Propriores de tera rica ia es la ojeto de rebelores esijente egalita sosial e la comparti comun de la ricia. La soldatos fidosa a la prinses ia supresa la revolta, e la gidores ia es executada. Martin Luther, inisior xef de la Reformi, ia ataca la rebelores e ia defende la atentas par la autorias de elimina los.

Pas de Augsburg

La Pas de Augsburg en 1555 ia declara la relijio de la prinse como la relijio ofisial de la rejion o pais (*cuius regio, eius religio*). Esta ia resulta la aseta e tolera de luteranisme en Deutxland par la catolicas. Cuando un gidor nova de un relijio diferente ia prende potia, multe persones ia debe cambia sua relijio. Multes ia trova ce esta es monarciste e la prosede no ia fini asta 1648.

En Europa norde (Deutxland norde, Nederland e Frans), la clase media ia tende es protestante, corespondente con sua etica e filosofia de labora. La campanianes ia cambia sua relijio per oteni labora.

Trata de Cateau-Cambrésis

Con la Trata de Cateau-Cambrésis en 1559, Espania e Frans ia acorda para luta contra lunlotra par uni contra sua menasa comun: la protestantisme, xef la calvinisme, cual ia es videda como un menasa plu grave ca la luteranisme.

Geras de relijio en Frans

En Frans, la gera interna relijial ia aveni entre 1562 e 1598 entre catolicas e protestantes. La corona ia apoia usual la catolicas, ma ia cambia lados a veses, e la nobilia ia es divideda entre ambos. La tre familias xef en la nasion ia compete per la controla de Frans. Esta familias ia es la familia Valois, cual ia governa e ia es catolica; la Bourbon, ci ia es formida par la ugonotes (protestantes franses); e la Guise, ci ia es catolica.

A fini, la familia Bourbon ia gania la gera, ma sua gidor Henrico de Navarre no ia pote es coronida car la site de Paris ia clui se. Henrico ia aseja Paris per un anio ante deside converti a catolicisme en 1593. La gera interna en Frans ia fini con la proclama de Nantes en 1598, cual ia reafirma ce catolicisme es la relijio ofisial en Frans, ma ia permite un grado importante de libria relijial e political a la protestantes.

Henrico 4 ia pote es descriveda como *politique*, o como algun ci cura plu la pas e ricia de sua nasion ca la tolera relijiosa.

La Gera de Tredes Anios

La Gera de Tredes Anios ia comensa con la Lansas de Fenetra de Praha, en cual protestantes ia lansa ambasadores catolica tra un fenetra en acel site. Lo ia fini con la Trata de Westfalen (1648) cual ia dona benefica a:

- ◆ Frans – aora la potia dominante de Europa. Lo ia para la uni de Deutxland e ia oteni Alsace-Lorraine.
- ◆ Nederland – Espania ia reconose final sua nondepende e ia deveni un potia economial per sesdes anios.
- ◆ Suiz – Lo ia oteni nondepende de la Impero Roman Santa.
- ◆ Svedia – Lo ia controla la Mar Norde e ia deveni un potia en la norde.
- ◆ Prusen – Esta ia marca la comensa de la asende de Prusen como potia militar.
- ◆ Protestantes – La Pas de Westfalen ia fini la Contrareformi e la calvinisme ia comensa es tolerada.

La trata ia es mal per:

- ◆ Espania e la Habsburg – Los ia perde colonias e revenu.
- ◆ La Impero Roman Santa e la Habsburg en Osteraic – 1648 es la data de la fini de la Impero Roman Santa.
- ◆ Catolicisme — La Pas de Westfalen ia fini con la Contrareformi e la supremia de la Eglesa.
- ◆ Unia deutx — Deutxland ia es mantenida en forma nonunida e divideda en multe statos governada par prinses.

Asolutisme en Europa

Introdui

La eda de asolutisme, esemplida par la “Re Sol” Louis 14 Bourbon de Frans, marca la asende de gidores en Europa ci ia ave potia asoluta supra sua nasiones. Mercatalisme ia deveni la forma prima de economia de acel tempo, en cual la problemes relatada con relijio ia desapare pos la geras european, aora recambiada par la problem de ecuilibra de potia.

Louis 14 (1638–1715), model de asolutisme

Louis 14 de Bourbon de Frans ia ariva a potia en 1643. El ia sposi Maria Theresa, fia de Filipo 4. Esta potia ia veni de la fato ce en sua rena el ia manteni un Frans unida e potiosa.

Louis ia vole controla Nederland par causa de sua potia economical como resulta de comersia, car el ia vole crase la calvinistes e protestantes, e car el ia vole aumenta sua teritorio. En fato, el ia consela sua eritor, Louis 15, a “no imita me en mea gusta per gera”. Sua politica atacante ia esije finansia la armada european la plu grande de 280 000 omes.

La geras de Louis ia ave resultas xocante, e la popla frances ia povri. Ance, la protestantes ia despeta Louis. Sua politica economical ia es gidada par Colbert e sua nasion ia es un model de reali mercatalisme. En sua rena, Frans ia deveni un pais dominante en lingua, cultur e vestes.

Lo es alegada ce Louis ia dise *L'état c'est moi* o “La stato es me”, e sua rena esempli asolutisme. La bispo frances Bossuet ia declara ce governa ia es un direto divin de la monarcas, conluinte ce la res ia es la representores de Dio sur la tera. Louis ia ata fundida sur esta crede, governante Frans como si el ta es elejeda par Dio per governa.

Jeneral, la ojetos esterna de Louis ia es la estende de teritorio e de catolicisme.

Louis ia es susedosa en sua aspiras interna per oteni potia asoluta par burocratia sentrida. El ia controla nobiles rebelante e ia pone se a la sentro de potia e cultur franses. Persones ia depende de el per avansa e ia xerca sua bonvole. Louis ia fa ce on construi un palasio en Versailles, de cual sua construi ia dura tra des-cuatro anios. Versailles ia es la model per otra paises european, e ia ocupa la nobiles, distraente los de la desira de opina sur governa. En 1685, Louis ia cansela la Proclama de Nantes, sutraente la diretos de la calvinistes en Frans.

La Gera de Transfere Espaniol

Filipo 4 de Habsburg ia sposi Marianna Habsburg de Osterreich, e los ia ave como fio Carlo 2, un gidor retardada fisical e mental. Car Carlo no ia pote ave desendentes, los ia lasa la deside sur sua seguor pos sua mori. Frans ia dise ce lo ave la reclama la plu bon de la trono car lo es catolica e forte, e la dui-sore de Carlo es sposida con Louis 14.

Como resulta, Carlo ia lasa la trono a Filipo 5 de Bourbon, la neto de Louis 14, e la gera ia eruta entre un alia de Willem 3 de Orange, Nederland contra Frans per manteni un ecuilibra de potia. La gera ia resulta la pas de Utrecht, en cual on ia deside ce la gidor de Espania debe abandona sua reclama a la trono franses. Tal, Filipo ia es reconoceda como re de Espania, ma la uni con Frans e Espania no ia aveni. Espania ia perde sua teritorios en Beljia e Italia en la Pas de Utrecht, un fonte de odia de la espanioles con sua governa nova.

La ecuilibra de potia en politica esterna

La ecuilibra de potia ia es un sistem en cual la nasiones european ia atenta manteni la autonomia nasional de tota la statos european. La conseta ia es ce tota nasiones european debe atenta preveni ce un nasion deveni potiosa, e donde governas nasional ia cambia frecuente sua alias per manteni la ecuilibra.

La Gera de Transfere Espaniol ia es la gera prima de cual sua tema xef ia es la ecuilibra de potia. Esta ia marca un cambia importante, car la potias european no ia ave plu la escusa de la gera relijial. Tal, la Gera de Tredes Anios ia es la ultima cual on eticeti como gera relijial.

La Lumina

En la sentenio 18 un grupo de filosofistes, xef franses, comensa developa un ideolojia cual ia deveni conosedada como la Lumina. Sua ojeto ia es promove educa e cultur per fini la nonsabe. Esta ideas ia es estendida en Frans par la *Enciclopedia*, editada par Diderot e d'Alembert.

Entre la filosofistes xef de la Lumina on pote nota:

- Voltaire, ci ia critica la instituidas franses e ia rejeta la pretes.
- Montesquieu, ci en sua obra *La spirito de la lejes* ia promove la separa de potias per evita tirania.
- Rousseau, ci en sua obra *La contrata sosial* ia defende ce la potia parteni a la popla (domina nasional) e ce la Stato emerji como resulta de un contrata entre sitadanes.

La burjesia ia defende esta ideas car los ia suporta lo.

Geras e revoluis

Nondepende de la Statos Unida de America

La Des-Tre Colonias brites en America norde ia revolta contra la briteses, comensante la Gera de Nondepende Esuan cual ia dura de 1765 a 1783. Lo ia fini con la nondepende de la colonias e la institui de la Statos Unida de America.



*Declara de nondepende
par John Trumbull.*

La colonistes american ia proclama “no impostas sin representa” comensante con la Stamp Act Congress en 1765. Los ia ave no representores en la Parlamento Brites e los ia rejeta la autoria de la corpo governante per imposta los. La protestas ia grandi a la Masacra de Boston en 1770 e la Boston Tea Party en desembre 1773. La Parlamento Brites ia responde, cluinte la porto de Boston e esecutante un serie de leges puninte cual ia sutrae la diretos de autonomia de la Colonia de Baia Massachusetts. La otra colonias ia suporta Massachusetts, e un grupo de gidores american ia institui sua propre governa en la tarda de 1774 en la Congressa Continental per coordina resiste contra Britan; otra colonistes ia manteni sua suporta a la Corona e ia es conoseda como fidistes.

La Trata de Paris ia es suscriveda a 3 setembre 1783, formal fininte la gera e confirmante la separa de la nasion nova de la Impero Brites. La Statos Unida ia prende controla de tota la teritorio a este de la Rio Mississippi e a sude de la Lagos Grande, Britan ia manteni la controla de Canada, e Espania ia prende Florida.

Entre la resultas importante de la gera de nondepende esuan ia es nondepende e comersia con Britan. Pos anios de governa sentral debil, la esuanes ia adota la Constitui de la Statos Unida, instituinte un governa sentral forte cual ia inclui un potia de esecuta, judores

nasional, e un legeria con du salones: la statos ia es representada en la Senado e la popla en la Casa de Representores. La gera ia provoca la migra de 60 000 fidistes a otra teritorios brites, spesial a America Norde Brites (Canada), an si la plu ia resta en Statos Unida.

La Revolui Franses

La nondepende de la colonias esuan ia influe a Frans do un revolui ia recambia la Rejimen Vea par un sosia plu libre e egal do la burjesia ia oteni potia political.



Jura de la Campo de Tennis.

Causas

Un combina de elementos ekonomial, sosial, political e ideolojial ia gida a la Revolui Franses en 1789.

- ◆ Criticas de la filosofistes de la Lumina ia dona la fundis ideolojial (separa de potias, monarcia parlamental, diretos umana) sur cual la revolui ia debe suporta se.
- ◆ Mali de ekonomia, con produidas fundal multe custosa.

- ◆ Crise finansial de la Stato e condui de la favoredas ante lo, cual ia comensa un crise political. Car la Stato ia nesesa plu revenu, la ministros de finansia ia propoza un reformi de impostas en cual la favoredas ia debe paia, ma estas ia rejeta lo. Par esta, la re ia asembla la Stratos Jeneral.

Avenis

La Stratos Jeneral ia es asemblada en maio 1789. En esta asembla la tre stratos – nobiles, pretes e la strato tre – ia es asemblada. Cada stratos ia ave un vota. La strato tre ia desira un vota per person, e pos alga semanas, la strato tre ia declara se como la Asembla Nasional (17 junio) e ia retira a un sala de tenis, e ala ia decide pronunsia la Jura de la Sala de Tenis a 20 junio, afirmante ce en cualce loca do los va asembla, acel va es la Asembla Nasional.

La re, per evita un gera, ia comanda un reuni de la tre stratos per dona un Constitui a Frans. Tal la Asembla Constituinte ia nase, e la Stratos Jeneral ia deveni un Asembla Constituinte dominada par la burjesia. La popla de Paris ia vide la vinse de revolui e ia ataca la Bastille a 14 julio.

En agosto, la Asembla Constituinte ia aboli la sistem feudal e ia scrive la Declara de Diretos de la Om e la Sitadan, en cual libria individual, propria e egalita de diretos ia es garantiada par la lege.

Per luta contra la crise finansial, los ia prende la propria de la benes de la Eglesa. En setembre 1791, un Constitui ia es aprobada, cual ia institui la conseta de domina nasional: Frans ia deveni un monarcia constitucional, fundida en separa de potias: esecutal (en la re), legal (en la Asembla Legislativa) e judal (en la judores de la Stato). La sistem elejal es en acorda con la conta de abitores (sola persones con alga nivel de ricia ia pote vota).

Pico pos la aproba de la Constituida, la familia real ia atenta fuji de Frans per oteni aida de potias stranjer, ma, descovreda en Varennes, Louis 16 ia es obligada a reveni a Paris.

La Asembla Leginte (1791–1792) ia fini con la vinse de la estremistes. On nota du partitos: la jirondines, representores de la burjesia alta e plu moderada, e la jacobines, representores de la burjesia basa e favorente la estremisme revoluinte. A esta du on debe ajunta la *sans-culottes*, pd. la popla. La politica es marcada par problemes con potias esterna, spesial Osteraic e Prusen, do la migrores ia reuni.

La Asembla, gidada par la jirondines, ia declara la gera contra Osteraic (april 1792), un gera cual ia estende tra Europa como gera ideolojial: Frans ia vole estende la revolui tra Europa, e la aristocratia ia vole defende la Rejimen Vea.

Frans ia es perdente, e cuando la osteraiceses ia es prosima a Paris, un revolta popular de la *sans-culottes* a 10 agosto 1792 ia ataca la palasio Tuileries. La Asembla Leginte ia fini, votante par direto de vota universal per un assembla nomida la Confere (*Convention nationale*).



Libria gidante la popla, par Eugène Delacroix (1830).

La Confere Nasional (1792–1794) ia acorda aboli la monarcia e ia proclama la Republica (setembre 1792). En esta eda on ia ave du momentos major:

- ◆ La prima es cuando la jirondines ia governa. Los ia vole salva la re, ma los no ia pote fa lo car Louis 16 ia mori a 21 janero 1793. Esta ia provoca divides en la Confere, e Espania e England ia entra en gera contra Frans (cual ia es ja en un otra gera contra Prusen e Osteraic). Car los ia teme un fini de la revolui, la jacobines, gidada par Robespierre e suportada par la *sans-culottes*, ia espulsa la jirondines de la Asembla en junio 1793.
- ◆ La numero du es cuando la jacobines ia governa. La revolui ia estremi, e esta eda es nomida la Teror. Tota oposores ia es matada e la represa ia estende an a la partito de Robespierre. La Constitui de 1793 ia es aprobada ma no ia es usada, car Robespierre ia governa como tirano.

La burjesia moderada ia teme la avansa de la clases popular e ia organiza un colpa de stato do los ia mata Robespierre a 28 julio 1794. La Confere ia es recambiada par la Dirijeria. La Dirijeria ia ave sinco membros con la potia de esecuta, elejeda par la potia leginte cual ia es composada par du asembles elejeda par vota restrinjeda. Esterna, Frans ia vinse sua enemis, ma interna la governa ia es atacada par la monarcistes e la radicales (jacobines e *sans-culottes*). La Dirijeria ia xerca la aida de la armada, cual ia deveni plu importante par sua vinses esterna.

En esta situa, un de la jenerales de prestijia maior, Napoleon Bonaparte, ia fa un colpa de stato a 9 novembre 1799 e ia institui la Consulia. La potia de esecuta ia es en la potia de tres consules. La prima de los, Napoleon, ia concentra tota la potias. En 1802 el ia es proclamada como la sola consul e per tota sua vive. Esta ia es fada par Pape Pio 7 en Paris.

Napoleon Bonaparte.



Napoleon ia forti la prinsipes fundal de la Revolui e ia cansela cualce atenta de restora monarcal o de estremisme jacobin. Sua politica interna ia servi como un model per otra paisas european. Con la Pape Pio 7 el ia suscrive la Acorda de 1801 par cual la Stato franses ia debe manteni la pretes, ma los ia pote vende sua benes. La Codigo Sivil (1804) ia es promoveda e imitada par otra paisas. En lo, multe aspiras de la burjesia ia es colieda, como libria individual, egalita ante la lege, e propria privata.

Sua sistem political ia es personal e autoritar, e la separa de potias de la Revolui ia es oblidada.

Napoleon ia atenta estende la ideas de la Revolui tra Europa ma sua concistas ia velia sentis nasional contra Frans. Sua projeta ia atenta crea un Europa unida su ejemonia franses, creante statos pupetin cual ia dona a membros de sua familia (Napoli, Nederland, Westfalen,

Espania). Multe potias (Osteraic, Prusen, Rusia e la Rena Unida) ia oposa sua projetas unida en alias diversa. El ia vinse Osteraic e Prusen ma no ia pote fa la mesma con Rusia e la Rena Unida. Con esta ultima, el ia atenta bloci lo con la aida de la marina espaniol.

An tal, el ia es vinseda par Nelson en la batalia de Trafalgar en 1805. Napoleon ia atenta un gera economical contra la Rena Unida, preveninte ce el comersia con Europa. Per bloci la Rena Unida, el ia debe concista Portugal. Sua soldatos ia traversa Espania e, profitante de la crise de la monarcia espaniol, el ia ocupa la pais, cual ia reata con la Gera de Nondepende Espaniol (1808–1813), comensada par la popla de Madrid a 2 maio 1808, segueda par tota la pais.

En 1812, Napoleon ia deside invade Rusia, ma el ia perde en la anio seguente en Rusia e Espania, e un alia ia vinse el en la batalia de Leipzig en otobre 1813. El ia es escluida a la isola Elba, ma el ia reveni en 1815. El ia restora la Impero, en un periodo nomida la Impero de la Sento Dias, ma el ia es vinseda en la batalia de Waterloo en junio 1815 e escluida a San Helena asta sua mori.

La Congressa de Wien

Pos cuando Napoleon ia es vinseda, la potias vinsente ia asembla en Wien per restora asolutisme. Du solves ia apare pos esta Congressa: un mapa european nova e un sistem political e ideolojia nomida la Alia Santa, fundida par la governa restorada.

La reconstrui de la mapa european ia segue la interesas de la potias vinsente, sin respeta aspiras nasional:

- ◆ Rusia ia ajunta Suomi e la plu parte de Polska (incluinte Warszawa).
- ◆ Prusen ia ajunta Rheinland.
- ◆ Osteraic ia reseta Lombardia-Veneto.
- ◆ La Rena Unida ia forti sua ejemonia en la mar, ajuntante Malta, la isolas Ionian, Kaap e Srilanca.

- ◆ Beljia ia es separada de Osteraic e unida a Nederland, forminte la Rena de Nederland.
- ◆ Frans ia reveni a sua fronteras de 1789.
- ◆ Italia ia resta dividada en statos nondependente.
- ◆ Deutxland ia institui la Confedera Germanica, integrante 39 statos, con Osteraic e Prusen entre los.

La Alia Santa ia es un trata entre la res de Osteraic (Franz 1), Rusia (Alecsandr 1) e Prusen (Friedrich Wilhelm 3) per manteni la ordina de la Congress de Wien. An tal, la canselor osteraises Metternich ia usa lo como un armada de asolutisme cuando el ia crea un selebra de Congressas per institui acordas de interveni en paises do promove libraliste e nasionaliste ia vinse.

Eda contemporanea

La temprana de la sentenio 19 ia es dominada par la tempo seguente la Revolui Franses e le Geras Napoleonal. An si Napoleon ia es vinseda en 1815 e la monarcia Bourbon ia es restorada en Frans, multe statos european ia es cambiada par 25 anios de disputas. Statos como Prusen, Osteraica e Nederland ia estende gracias a la pas de 1815. Otra paises como Polska ia es disolvida en esta prosede de solidi statal. Esta cambiones nasional ia es acompaniada par un senti intensa de nasionalisme en la popla de multe statos, cual ia es promoveda par la ideas de la Lumina e estendida tra Europa par la concistas napoleonales.

En la desenos pos la pas de 1815, multe paises european ia sufri disputas social car la poplas ia vole reclama sua diretos contra la gidores autocrata de sua statos. Esta ia produi lo cual la istoriste Eric Hobsbawn ia nomi *la Eda de Revoluis*, car la tensa en statos ia eruta frecuente en revoltas political como la revoluis franceses de 1830 e de 1848.



La macina de vapor de Watt, un de la forsas gidante de la Revolui Industrial.

La cambias xef de la Eda Contempora es la seguentes:

- ◆ La Revolui Industrial, cual ia sustitui per la fabrica par mano un sistem nova de produi, fundida sur la organiza de labora en fabricerias. Lo ia comensa en la Rena Unida e ia estende a otra paises como Frans, Beljia, Nederland, Deutxland, la Statos Unida, Nion, etc. Esta ia orijina multe cambias sosial e demografial como la migra de la campania a la site, bonis medical, la apare de costumes e produidas nova, la developa urban, revoluis en transporta, e progresia siensal.
- ◆ Libralisme, ideolojia de la burjesia, ia estende tra Europa, an si lo ia provoca multe disputas e geras (1830, 1830 e 1848). Libralisme economial es fundida sur la ofre e compra, la libria per produi, la divide de labora, e la noninterveni de Stato en economia (*laissez-faire*). Esta sistem no atende la laborores.
- ◆ Nasionalisme: Esta ideolojia ia promove la uni de Deutxland e Italia e la autonomi de la elinicas, beljeses e otras poplas su imperos grande.
- ◆ Imperialisme: Potias european como la Rena Unida, Frans, Deutxland e Rusia, Nion e la SUA, motivada par la desira de oteni materias cru e mercatos nova, como ance per crese sua prestijia e furnis, ia ocupa e divide Africa e cuasi tota Asia en alga anios (1870–1914), e ia influe a America Sentral e Sude.
- ◆ Pos esta, multe colonias ia oteni nondepende de la Rena Unida (la Statos Unida) e de Espania e Portugal (America latina) en la sentenios 18 e 19. La paises african e asian ia oteni lo en la dui du de la sentenio 20. Esta es la descoloni.
- ◆ La promove de diretos de laboror. La laborores urban ia comensa organiza se contra la sosia industrial burjes e per defende sua interesas. La promoves prima ia destrui la macinas (ludisme) e a pos ia comensa organiza sindicatos, promoves political e internasional de diretos de laboror. La ideolojia comuniste (Karl Marx) e anarciste

(Bakunin) ia estende en la sentenio 19 e ia vinse en Rusia (Revolui Rusce), Jonguo (Mao) e Cuba (Fidel Castro). Esta sistemes ia mostra sua perosia pos alga tempo.



Un xines con vestes mandju, con la Rea Victoria (Impero Brites), Wilhem 2 (Impero Deutx), Nicolas 2 (Impero Rusce), Marianne (Republica Franses Tre) e un samurai (Impero de Japan) daginte un torta con “Chine” (“Xina” en franses) scriveda sur lo. Un depinta de Imperialisme Nova e sua efetos en Xina.

- ◆ La crese de capitalisme ia es multe grande en cuasi tota la mundo. La economias de potias grande ia crese contra la paises de la Mundo Tre. On ia ave crises siclin con perde de labora.
- ◆ Geras mundial: La disputas imperialiste, economial e ideolojial entre nasiones ia promove du geras mundial. La Gera Mundial Prima ia aveni entre 1914 e 1918 e la Gera Mundial Du entre 1941 e 1945.



En la Gera Mundal Prima, cual on pote defini como un gera interna european, la Aliadas ia es dividida entre la Impero Osterreich-Magiar e Deutxland a un lado e Frans, England e Rusia a la otra.



La Confere de Yalta, con la representores de la vinsores: Winston Churchill, Franklin D. Roosevelt e Joseph Stalin, ci ia desinia la mapa de Europa pos la fini de la Gera Mundal Du.

